

四庫全書

子部

欽定四庫全書

子部

野萊博錄卷三

詳校官中書_臣竇汝翼

編修_臣倉聖脈覆勘

總校官編修_臣王燕緒

校對官待詔_臣胡士震

謄錄_臣監生_臣吳繼緒

繪圖_臣監生_臣牛炳文

欽定四庫全書

野菜博錄卷三

木部

明
鮑山
撰

茶樹柯

葉可食




茶樹柯一名茗一名薺樹柯叢生大小類枝子葉春初生芽作細茶葉長半寸餘作麤茶味苦性寒無毒

食法採嫩葉焙作茶煮去苦味二三次水淘淨油鹽

薑醋調食

木槿樹



木槿樹一名舜如葵花淡紅色五葉成一花朝開暮斂
亦有千葉者性平無毒葉味甜

食法嫩葉燂熟冷水淘淨油鹽調食


龍栢芽



龍栢芽生山野中此木若年久亦大葉似初生椶櫚葉
短小葉味微苦

食法採芽葉爍熟換水浸淘淨油鹽調食

木葛



木葛生山野中樹高丈餘葉似杏葉圓味微甜

食法採葉燂熟水浸淘淨油鹽調食


凍青樹



凍青樹枝葉似桂樹極茂盛凌冬不凋開白花結子如
豆粒大青黑色葉味苦

食法採芽葉燥熟水浸去苦味淘淨油鹽調食


月芽樹



月芽樹又名仍芽莖似槐條葉似歪頭菜葉短硬味甘微苦

食法採嫩葉燂熟水浸淘淨油鹽調食


白楊樹



白楊樹處處有之此木高大皮白色葉似梨葉圓肥背
白葉邊鋸齒狀味苦性平無毒

食法採嫩葉燂熟作成黃色換水淘去苦味洗淨油
鹽調食


木藥樹



木藥樹生山谷中樹高丈餘葉似楝葉寬大稍薄開淡
黃花結薄殼中有子大如豌豆烏黑色人多摘取串作
數珠葉味淡甜

食法採嫩芽葉燥熟換水浸淘油鹽調食


老葉兒樹



老葉兒樹生山野中高六七尺葉似李樹葉而長邊有毛葉味甘微澁

食法採葉燂熟水浸去澁味淘淨油鹽調食

青楊樹



青楊樹生山野中樹高大葉似白楊樹葉狹小青色皮亦青色葉味微苦

食法採葉燂熟水浸作成黃色淘淨油鹽調食


椿樹芽



椿樹芽一名樗樹芽係二種椿芽葉香紫色樗芽疎而臭氣不可食椿芽微苦回味性熱無毒

食法採芽葉焯熟水浸淘淨油鹽調食

黄檀



黃蘗生山野中木黃色枝莖紫赤色葉似杏葉圓大味
苦性寒無毒

食法採嫩芽煤熟換水淘去苦味油鹽調食

檀樹芽



檀樹芽生山野中樹高一二丈葉似槐葉長大開淡粉
紫花葉味苦

食法採芽葉燂熟浸去苦味淘淨油鹽調食

山茶科



山茶科生山野中，科高四五尺，枝梗灰白色，葉似皂莢，葉圓四五葉攢生一處，葉甚稠，味苦。

食法：採葉，煤熟，水浸淘淨，油鹽調食，或蒸曬乾作茶煮飲可。


箬樹



筴樹生山谷中樹高丈餘葉似槐葉大却軟薄似檀樹
葉薄小開淡紅色花結子如菰豆大熟則黃茶褐色其
葉味甜

食法採葉燂熟水浸淘淨油鹽調食


臭竹樹



臭竹樹生山野中樹甚高大葉似楸葉厚花又似拐棗
葉亦大其葉面青背白味甜

食法採葉燂熟水浸去邪臭氣味油鹽調食

回回醋



回回醋一名淋樸橄生山野中樹高丈餘葉似椿葉厚
太邊有鋸齒或三葉或五葉排生一莖開白花結子大
如豌豆熟紅紫色味酸葉味微酸

食法採葉燂熟水浸去酸味油鹽調食用子調和百
味如醋

槭樹芽



槭樹芽生山野間木高一二丈葉似野葡萄葉五花尖
又似絲瓜葉却小淡黃綠色開白花葉味甜

食法採葉燂熟水浸作成黃色換水淘淨油鹽調食

女兒茶



女兒茶一名牛李子生山野中科條高五六尺葉似郁
李子葉長大稍尖葉色光滑微黃綠結子如豌豆大生
青熟黑茶褐色葉味淡微苦

食法採嫩葉燂熟水浸淘淨油鹽調食

白槿樹



白槿樹生山谷中樹高五七尺葉似茶甚潤大光潤開
白花葉味苦

食法採嫩葉燂熟換水浸去苦味油鹽調食


烏稜樹



烏稜樹生山野中樹高丈餘葉似省沽油葉背微白開
白花結子如梧桐子大生青熟紅葉味苦

食法採葉燂熟換水浸去苦味作過淘洗淨油鹽調
食


刺楸樹



刺楸樹生山野中樹高大皮色蒼白上有黃白斑枝梗
多有大刺葉似楸葉薄味甘

食法採嫩葉燂熟水浸淘淨油鹽調食


黄絲藤



黃絲藤生山野間形類葛條葉似山格刺葉小背微白
邊有細鋸齒味甜

食法採葉燂熟水浸淘淨油鹽調食


山格刺



山格刺生山野間葉似白槿樹葉短尖味甘

食法採葉煤熟水浸作成黃色換水淘淨油鹽調食


報馬樹



報馬樹生山野中枝似桑條葉似青檀葉大邊有花又
葉味甜

食法採葉煤熟水淘淨油鹽調食硬葉煤熟水浸作
成黃色淘去涎沫油鹽調食


堅英樹



堅莢樹生山谷中樹枝堅勁可以作棒皮色烏黑對分枝又葉似拐棗葉却大色淡綠亦對生開黃花結小紅子葉味苦

食法採嫩葉燂熟水浸去苦味淘淨油鹽調食

楫芽樹



楫芽樹葉似冬青葉微長開白花結青白子其葉味甜
食法採嫩葉燂熟水淘淨油鹽調食


白辛樹



白辛樹生山野間樹高丈許葉似青檀樹葉頗長色微
淡綠又似月芽樹葉大色亦差淡葉味甘微澁

食法採葉燂熟水浸淘去澁味油鹽調食

榎樹



椴樹樹甚高大其木細膩枝又對生葉似木槿葉長大
微薄色頗淡綠皆作五花極又邊有鋸齒開黃花結子
如豆粒大色青白葉味苦

食法採嫩葉煤熟水浸去苦味淘洗淨油鹽調食

臭蕪



臭蕕科條高四五尺葉似杵瓜葉尖梢又似金銀花葉
亦尖梢五葉攢生如一葉開花白色其葉味甜

食法採葉燂熟水浸淘淨油鹽調食


椒樹



椒樹一名川椒本草名蜀椒生蜀郡川谷間高四五尺
枝莖有刺葉似蕃蔴葉堅硬結實無花葉間如豆顆皮
紫赤色中有小黑子味辛性溫大熟有小毒

食法採葉煤熟換水浸淨油鹽調食

雲桑



雲桑生山野中樹枝葉皆類桑但葉頭有花又如雲開
細花青黃色葉味微苦

食法採嫩葉煤熟換水浸淘去苦味油鹽調食或蒸
曬作茶亦可

馬魚兒條



馬魚兒條俗名山皂角生荒野中葉似初生刺蘼花葉而小枝梗色紅有刺似棘針微小葉味甘微酸

食法採葉燂熟水浸淘淨油鹽調食

省沽油



省沽油一名珍珠花科條似荊條圓枝又對生葉似驢
駝布袋葉大又似葛藤葉小每三葉攢生一處開白花
似珍珠色葉味甘微苦

食法採葉燂熟水浸淘淨油鹽調食


兜櫨樹



兜櫨樹一名壞香葉似回回醋樹葉薄窄又似花椒樹
葉却少花又葉皆對生味苦

食法採嫩芽葉燂熟水浸去苦味淘洗油鹽調食

花楸樹



花楸樹生山野中樹高大葉似回回醋葉微薄邊有鋸齒又葉味苦

食法採芽葉煤熟換水浸去苦味淘洗淨油鹽調食

棕子樹



棕子樹樹有大者初生作科條狀類荆條對生枝又葉似柿葉薄小兩葉對生開白花結子細圓如豌豆大生青熟黑色味甘鹹性平無毒葉味苦

食法葉煤熟水浸淘去苦味洗淨油鹽調食

垂柳



垂柳有二種枝葉上生為楊枝葉下垂為柳其樹高大
各處多有性寒味苦無毒

食法採嫩芽葉燂熟淘去苦味油鹽調食


黄棟樹



黃棟樹葉似初生椿樹葉極小又似棟葉微帶黃色開
花紫赤色結子如豌豆大生青熟紫赤色味苦

食法採嫩芽葉燂熟換水浸去苦味油鹽調食


夜合樹



夜合樹一名合歡一名合昏木似梧桐枝甚柔弱葉似
皂莢葉又似槐葉極細密每一風來輒似相解了不相
牽綴其葉至暮而合花發紅白色瓣上若絲茸然散垂
結實作莢子極薄細味甘性平無毒

食法採嫩葉燂熟水浸淘淨油鹽調食


槲若



榲若一名榲木一名斗樹生山谷中樹頗高大葉似桑
樹葉其味甘性平無毒

食法採嫩葉燂熟油鹽調食


黄蘗



黃蘗一名藥木一名子藥生山谷中樹高數丈葉似茅
莧葉經冬不凋皮外白色裏黃色其味苦性寒無毒

食法採嫩葉燂熟浸去苦味油鹽調食

蜜蒙



蜜蒙一名寒不凋生山谷中樹頗高大葉似冬青樹葉
又似橘葉而厚背白色有細毛味甘平性微寒無毒

食法採嫩葉煤熟油鹽調食

菴摩勒



菴摩勒一名餘耳生山谷中其樹高大枝條甚軟葉青
細蜜朝開暮合花著條而生如粟粒大味苦性寒無毒
食法採嫩葉煤熟水浸去苦味油鹽調食

杜蘭



杜蘭一名林蘭生深山中樹高數仞葉似茵桂葉有二
道縱文其味苦性寒無毒

食法採嫩葉燂熟油鹽調食


白棘



白棘一名棘鍼一名棘刺生山中柯莖多刺葉似酸棗
葉又似赤刺葉開花結實如棗形味辛性寒無毒

食法採嫩葉燂熟油鹽調食

海桐皮



海桐皮生山谷中樹高二三丈葉如手大味苦性平無
毒

食法採嫩葉燂熟水淘淨油鹽調食


落鴈木



落鴈木生深山中其科苗作蔓纏繞大木葉似茶葉不
結花實味平溫無毒

食法採嫩葉煤熟油鹽調食


沒藥樹



沒藥樹生深山谷中其樹頗極高大葉似楓樹葉味苦
性平無毒

食法採嫩葉煤熟水浸去苦味油鹽調食

南藤



南藤一名丁公藤一名象豆生山谷中延石壁古木纏
遶其苗如馬鞭有節紫褐色葉似杏葉短尖味辛烈無

毒

食法採嫩苗葉燂熟油鹽調食

乾漆



乾漆一名地節一名黃芝生山中樹高二丈餘皮白色
葉似椿樗葉花似槐花結子如牛蒡子其味辛溫無毒
食法採嫩葉煤熟油鹽調食

木天蓼



木天蓼一名蓬萊金蓮枝生山谷中樹高數丈餘葉似
枝子花葉開花似小蓮花其味辛溫有毒

食法採嫩葉煤熟油鹽調食


釣藤



釣藤一名釣草藤生山谷中莖上有刺如釣葉似通山
藤葉味微寒無毒

食法採嫩苗葉燂熟水浸淘淨油鹽調食


五倍子樹



五倍子樹一名文蛤一名百蟲倉生山谷中葉似椿樹
葉無花結實如拳內多小蟲其味苦酸性平無毒

食法採嫩葉燂熟油鹽調食

獨搖樹



獨搖樹一名水榆一名高飛一名蒲楊生山谷中樹頗
高大葉有三角其味苦無毒

食法採嫩葉燂熟水浸去苦味油鹽調食

伏牛花




伏牛花一名隔虎刺生山谷中樹頗高大葉似黃蘗葉
梗多刺莖赤色花開淡黃色作穗似小杏子味苦甘無

毒


食法採嫩葉煤熟油鹽調食

杉木



杉木一名杉材一名杉菌生深谷中樹頗高大勁直葉
附枝生若刺葉似刺柏葉又似榧樹葉味苦性溫無毒
食法採嫩苗葉燂熟水浸去苦味油鹽調食

接骨木



接骨木一名木蒴藿生深谷中樹高大丈餘葉似水芹
葉開花似陸英樹花其味甘苦性平無毒

食法採嫩葉燂熟油鹽調食

藩籬枝



藩籬枝一名軟枝鬚其本不甚高大枝梗俱帶軟葉似
枸杞葉性平味寒稍有毒

食法採嫩葉煤熟油鹽調食

臘梅花
花可食



臘梅花樹枝條類李樹葉似桃葉寬大微厚紋脉甚細
開淡黃花味甘微苦


食法採花煤熟水浸淘淨油鹽調食

馬棘



馬棘生山野間科高五七尺葉似新生皂莢葉却小稍
間開粉紫花味甜

食法採花燂熟水浸淘淨油鹽調食



野菜博錄卷三